

欽定剿平三省邪匪方略

欽定剿平三省邪匪方略正編卷七

丙辰年

四月初九日

甲申

景安奏言本月初四日據署鄧

州知州周璣稟稱有楚省匪徒數百人由襄陽

縣突入州境守卡千總張懷毓兵單不能抵禦

該匪等在古村等處糾約土匪肆行滋擾又據

稟盤獲本州人文修訊據供認邪教聞楚省教

頭袁錦元過境在夏莊起事前往幫助等情當

經該州會營正法稟請撥兵接應前來

臣

查新

野東西兩路賊匪共有四處逆氛甚熾距新野

之新店水臺並唐縣之倉臺等處僅二三十里

不等均經

臣

分撥將弁紮營堵禦若一經撤調

賊必乘虛直入而三營兵數又止數百名亦不

能抽撥現在鄧州賊匪滋擾之處離南陽較近

是以先於南陽守城兵內抽調二百名令遊擊

常山帶領就近前往相機撲剿

臣

又恐南陽府

城空虛賊匪越鄧侵郡當將署南陽鎮揆明調

令防守新野

臣

抽帶滿營兵一百名星夜趕抵

郡城以便彈壓策應查鄧州城池堅固早經派

撥弁兵防守又有遊擊常山帶兵前往賊匪尙

不敢窺伺州城但

臣

查襄陽呂堰驛等處均在

襄陽迤北前據鄂輝告稱現在襄陽兵力不敷

茲復蔓延侵及豫境糾約鄧州教匪肆行滋擾
寬州鎮兵到此尙需時日臣現復飛催兼程前

來由鄧州赴襄分剿惟是賊氛四延雖有寬鎮

兵一千名尙不足用臣已飛咨河北鎮臣張文

奇於彰衛二營撥調弁兵五百名前來南陽聽

調第河北亦關緊要並屬該鎮臣不必親來一

面飛咨直隸正定鎮撥兵五百名派叅遊大員

帶領就近移駐彰德衛輝以壯聲勢臣俟覓鎮
兵到奮力進剿外仰懇

皇上天恩賞發京兵迅速前來由鄧及襄陽加剿洗

俾早得殲除逆黨以靖地方再臣連日探訪情

形賊匪多係步行手持不過矛刀等物官兵臨

陣鎗箭齊發所斃固多惟賊衆蜂擁而前官兵

往往措手不及以臣愚見豫省平壤最宜馬兵

衝突次用鎗擊箭射賊必四散奔逃然後再用
兵四圍抄殺實可制勝惟是兗州鎮兵帶來馬
匹長途疲乏一到卽須更換臣業經札飭籌款
購買五百匹以脩應用

同日畢沅惠齡奏言保康縣被賊人蹂躪該縣
知縣陳世章前據鄖陽府知府王正常稟報爲
賊所害一時無總理之員臣等以南漳緊接保

康易於照料因卽令南漳縣知縣李芸經號召
鄉勇相機克復李芸經卽發給諭帖多張懸賞
鼓勵保康一屬聚集義勇甚多三月十一日有
西路鄉勇護送保康縣令陳世章到漳並獲追
趕陳世章之逆匪高潮孝馮大元二名是時安
襄荆道王奉曾等駐劄南漳提訊陳世章據供
保康本在山坳向無城垣存兵祇有三十五名

因賊匪四路堵截援兵不能接應二月十九日
夜賊人圍燒衙署殺死伊妻朱氏其子受傷未
知生死有賊將伊抱住用繩網縛搜去印信該
令罵賊不食被羈南門外繼又送至離城數十
里之孤莊派賊看守不令自盡後聞賊人被南
漳官兵殺敗紛紛逃散止剩該令一人各鄉勇
護送來漳求發救兵途遇賊匪追趕卽被鄉兵

獲住二人等語該處義勇見知縣尙在益加勇
往情願糾人克復有保康首事王珍生員郭必
祥等糾集義勇萬餘人於十八日將佔據逆匪
圍殺大半復據義勇宋文太張同斬取逆匪黃
俊易尙選趙朝臣段文達等首級二十六顆白
布大小旗七十二面生擒逆匪何仁段英戴正
福陳官四名該縣復帶領兵役前往查探二十

四日行至觀音堂殺賊二十一名直抵縣城賊
目姚姓已經鄉勇鎗斃又生擒賊目曾世興
等查首事王珍生員郭必祥等深明大義剿殺
賊匪實爲出力可嘉已恭傳

恩旨分別賞給六七品頂戴餘俱從厚賞賚無不歡
欣鼓舞惟保康在萬山之中又無城郭可據是
不難於復而難於守臣等一面鼓勵義勇令其

乘勝再行搜捕餘孽一面飛咨恒瑞等酌量情
形分兵協應其被難民人等急須綏輯該令陳
世章雖據供罵賊不屈但究已失守未便再令
回任現委業經卓異之京山縣縣丞楊開鏡前
往署事令其妥協安撫招集賑卹無使難民失
所至鄂輝於二十三日馳抵襄郡是時賊匪聚
於該府屬之孟家集適頭等侍衛烏什哈達總

兵徐昭德先在張家集瓦子崗痛洗賊衆帶兵到彼紮營鄂輝前往會剿是夜賊由瓦子崗至打伙店潛劫大營兩三次俱被官兵殺退次早查看營外尙有中鎗賊屍五名二十五日鄂輝等帶領陝兵八百餘名代辦同知陳文鉅率領鄉勇隨行各至孟家集會齊賊人拚命來迎陝兵烏鎗純熟鎗斃賊人無數乃賊猶愍不畏死

直撲戎兵外委郭章立殺七人賊匪羣攻致被
賊害鄂輝烏什哈達徐昭德見賊勢兇惡督同
陝省遊擊巴哈布蘭州都司王化龍襄陽遊擊
朱廷荃一齊縱馬馳衝鎗箭齊發殺死騎馬賊
目八名餘賊五六百名並經各鄉勇從後抄殺
擒斬金德等十一人割獲首級二十餘顆奪獲
器械無算未盡賊夥現在鄂輝等偵探確實卽

往痛殲至鄖陽一路現接秦承恩札會恒瑞於
三月十五日行抵竹山已將縣城克復臣等當

派知縣譚應麒前往署理撫輯難民至房縣自
鄉勇解圍以後匪徒復來窺伺三月十七日經
該處生員杜作霖劉作樞進剿杜家川燕子坪
殺賊一百餘人搜擒夥匪周貴等十四名同日
義勇劉大忠將竹山竄入之城匪二百餘人四

面圍住全行殺斃又已革外委黃國用生員邢
觀澤殺斃混充鄉兵之賊目孫潛書等三百餘
人二十日職員樊希儒等將房保交界之茨坪
賊寨攻破殺斃賊目彭長惠等二名賧賊五百
餘名又各卡盤獲陳大學等七十五名俱經訊
明正法此時房縣西北兩鄉已經寧靜其餘未
盡夥黨恒瑞卽日統兵由房至保一路可期掃

蕩再鄭縣鄆西等處亦有零星賊匪竄擾陝甘
督臣宜綿已派固原兵五百名前赴鄆郡自可
沿途殲洗惟襄陽賊匪尙多且逼近呂堰驛路
恐有竄入豫境茲奉

諭旨派調兗州兵一千名來襄甯爲得力臣等已知

會鄂輝等調遣分剿如河南邊境需兵亦可彼
此通融互相接應

同日梁肯堂奏言臣接奉調兵

諭旨後卽自省起程馳赴正定按營如數挑派二千
名點驗軍裝器械違員帶領擬分四起每起五
百名間日饋行並一面飛咨豫省安速預備計
該兵丁等行至前途慶成卽可輕騎趕上統領
進剿至正定地方臣復密囑該鎮明泰不露聲
色安爲彈壓均奏入

上命軍機大臣傳諭恒瑞永保畢沅曰南陽與襄陽接壤鄧州新野地方現有匪徒滋擾該處存兵無多景安因不敷派撥防堵遂有請發京兵之奏昨已派令慶成帶領正定順廣各營兵二千名星速赴豫景安爲此奏時白尙不知也又據畢沅奏房縣保康賊匪業經鄉勇剿散是鄧陽所屬漢江迤南之賊已漸次肅清鄧陽與襄陽毗連恒瑞永保

卽可帶兵就近迅赴襄陽會剿至景安所調河北
彰衛二營弁兵五百名一節尙欠斟酌河北地方
亦關緊要不應輕有調動所有慶成帶往直隸官
兵二千名俱著留於南陽一帶以資分路堵剿其
河北之兵如尙未起程著景安飛飭停止倘已起
程距南陽不遠亦不必令其轉回卽於直隸發起
官兵內酌撥五百名留於河北交張文奇分撥彈

壓再正定順廣各營官兵既經調赴豫省直隸督標五營兵額較多與其閒住省城莫若照數派撥二千名前赴正定順德廣平各營分駐以資彈壓而壯聲勢至京兵素稱精銳固可以一當百八旗及火器健銳二營勁旅甚多並非靳而不與現已密爲預備二千名景安不妨傳知該處百姓人等以京兵現派萬餘不日可到不特民心藉以鎮

定更可使賊匪聞風膽落朕之不卽發京兵者以
統領實難其人巴圖魯大臣侍衛等於領隊尙能
勝任若當統率之責恐不足以資駕馭總之辦理
大事必須持以鎮靜景安接奉昨旨得直隸官兵
前往之信自己稍有把握南陽地方被賊滋擾之
處著該撫卽先行謄黃曉諭將本年應徵錢糧概
予緩徵湖北枝江等二十州縣前已降旨豁免錢

糧外如續有被賊搶掠之處並著畢沅等查明一體奏請豁免並先行謄黃曉諭俾良民益加感激至保康縣治本無城垣該縣陳世章猝不及備家屬既被殺害陳世章罵賊不屈爲賊囑困其失守之罪尙屬可恕且賊匪不卽加害而鄉勇人等得見該令共相奮勇殺賊似陳世章尙得民心現在恒瑞永保帶兵在保康一帶著順道密查如該縣

始經罵賊或被縛後不免失體求生之處自未便
置之不議若實係罵賊不屈卽一面具奏一面知
會畢沅等仍令留知縣本任亦無不可外委郭章
殺賊七人力竭被戕殊堪憫惻著該督等卽咨部
照守備例議卹其剿賊出力之生員郭必祥等鄉
勇王珍等均著分別賞給六七品頂戴已革外委
黃國用並著復還原職以示鼓勵其餘隨同出力

鄉勇人等仍遵前旨酌賞鹽菜口糧再房縣保康
賊匪卽經鄉勇人等剿散所餘匪黨可派令將弁
在彼搜查恒瑞永保當帶兵兼程速赴襄陽與慶
成景安南北夾攻羣賊聲勢旣壯而畢沅惠齡將
兩處賊匪辦竣亦可自南而北四面兜擒賊匪自
無從逃竄倘恒瑞永保到襄陽後酌量該處情形
若實有必須京兵之處卽會同景安等據實具奏

立即發往亦未爲遲

初十日乙酉惠齡奏言查賊匪高據灌灣腦山嶺

其附近山梁及可通賊巢要路均遣匪黨紮卡
距守並埋有地雷適連日大雨山水下注聞賊
卡所埋地雷被水灌入全行塌陷自應乘此機
會奪占賊卡以便分路夾攻隨於二十九日密
飭後路防卡員弁各帶兵勇於四月初一日黎

明分赴賊巢左近山梁用礮轟擊使賊匪急趨
後路抵拒不暇顧及山前又因聶家河爲賊匪
逃竄必由之路撥兵二百名交副將張持帶往
堵禦

臣

隨與富志那侍衛關騰道員先福及將

備等統兵前進齊至楊白堰山梁賊匪見官兵
冒雨前來卽放鳥鎗並用石塊亂擊官兵一擁
向前鎗箭齊發殺死一百餘人賊匪捨命抗拒

官兵鄉勇人人爭先拔開鹿角跳過濠溝直入
卡內短兵相接殲賊無算臣等率領官兵分投

追剿又殺死三百餘名並據先福額勒金保等
帶領兵勇於樹林山坳內搜獲賊目張正端一
名賊夥楊一鳳等四十七名知縣楊界生擒賊
目周以恭等十八名同知慶恩知縣庾泰均在
糧臺左近拏獲李士鳳等七名計此次殺斃及

生擒者八百餘人臣隨分撥官兵卽於該處將

卡紮住並據卡員徐鳳翔朱槐劉春等稟報在

陳家湖王家坂等處各用礮擊死賊匪數十人

百餘人不等又據富保蔣振萬將陳家湖賊匪

新築卡座復行拆毀張正謨劉宏鐸皆受鎗傷

尙不甚重其餘因傷身死者二百餘名灌灣騰

山洞內尙有糧三千餘石皆係張正謨劉宏鐸

等於上年冬月間陸續運往收藏現因官兵各處設卡截殺不能下山搶劫始將此糧分食等語_臣等隨將各犯分別凌遲梟示是夜又有賊匪二百餘人向熊渡河邊欲行偷渡經劉春蔣振萬帶領兵勇等截住殺死二十餘人賊卽奔至聶家河鳧水欲逃又被張持富保色拉布等放鎗打死數十人賊仍逃回山內再三月初十

日據署長陽縣沈堂具報該縣西界與巴東歸
州毗連之榔坪九洲二處有逆匪林之華戈統
希二犯各糾約匪黨二三千人聲稱欲來深冲
口救應張正謨等現於各鄉村肆行焚搶該縣
並無城垣請發兵速剿等情旋據臬司張長庚
稟稱現在長陽縣匪徒滋事因署巴東縣黃應
文遊擊邱作訓等搜剿東沔一帶賊匪甚爲勇

往出力當卽飭調該員等統領原帶兵勇前往

剿捕

臣

恐該賊匪聞捕東來或竟直逼長陽縣

治該處與聶家河甚近隨撥兵一百六十名交

守備張鼎帶領前赴長陽飭縣添撥鄉勇設卡

堵禦茲據張長庚稟稱黃應文等於三月二十

六日行抵沙坪地方該匪林之華遣其夥黨李

問祥等三十四人冒作附近鄉民賫帶米肉等

物聲稱犒師該員心疑盤詰究出林之華欲乘
夜劫營遣來潛爲內應並於各該犯身畔搜出
短刀引火之物當將該犯等卽行正法是夜果
有賊匪前來撲搶經該員等督率兵勇將賊擊
退次日正行至查角石地方突遇匪徒四五千
人蜂擁而至官兵施放鎗礮火藥均被淋濕不
能點放賊匪隨將官兵四面圍住黃應文同其

子厚生黃揆及遊擊邱作訓隨營効力之捐職
縣丞林江奮力擊殺各手刃數人黃揆林江又
各殺執旗賊目一人因衆寡不敵黃應文邱作
訓黃揆林江俱各陣亡効力武舉趙時愷腿受
鎗傷經千總歐凱率同各効力武生陳正愷等
保領餘衆奮力殺出至沙坪紮住現在該司復
撥精練鄉勇五百名交叅將諾音保帶往督同

千總歐凱等悉力守禦一面飛札長陽及聯界之長樂巴東歸州等州縣一體設卡嚴防毋令竄入並據署長陽縣沈堂稟稱守備張鼎帶領兵勇於二十九日行至秀峯橋見有賊匪百餘人正欲過橋該備督率兵勇施放鎗礮殺賊數十人賊匪退走該備奮勇前追詎兩旁溝內突出數千人將該備圍住該備左右衝突手刃數

人因傷甚重墜馬陣亡時外委張承貴鄭興朝
在後督運軍火聞信往救賊已散去當收集餘
兵於小峯亞紮卡堵禦臣聞之不勝憤恨刻下

又不能分兵前往已飛咨恒瑞或令文圖帶令
原兵卽由興山一帶前至長陽相機剿殺奏入

上命軍機大臣傳諭恒瑞永保畢沅惠齡曰惠齡統
率官兵冒雨進攻將賊險要隘口立時奪獲迅搗

賊巢所辦可嘉其隨同打仗出力之富志那關騰
先福額勒金保許文謨塔思哈林朝輔鄧興相及
殲獲賊匪之楊界慶恩庾泰徐鳳翔朱槐劉春富
保蔣振萬張持色拉布俱著咨部議敘如能始終
奮勉再予陞用其餘兵丁鄉勇人等亦著照前分
別賞賚陣亡知縣黃應文及伊子廩生黃拔遊擊
邱作訓守備張鼎縣丞林江俱著咨部加等議卹

並查明黃應文如尙有子嗣於事竣後送部引見
受傷武舉趙時愷亦著存記陞用至長陽一帶賊
匪乘虛蟻聚不可不速行撲滅目下畢沅惠齡正
在兩處剿賊緊要之際未能分身前往該處亦必
須大員帶兵督剿文圖接准惠齡札會自應就近
由興山一路速往但恐文圖一人尙不足以資董
率昨因襄陽南陽一帶賊匪滋擾已傳諭恒瑞永

保速赴剿辦今長陽長樂東湖巴東歸州一帶剿
賊亦關緊要著傳諭恒瑞永保二人酌分一人帶
兵速赴襄陽一帶該處有鄂輝在彼可以幫同辦
理一人卽赴長陽歸州一帶督率剿辦此時惠齡
軍營已得勝勢長樂長陽之賊俱係張正謨黨與
思往接應惠齡惟當倍加奮勉將賊首張正謨拏
獲其餘各處接應匪黨自必紛紛瓦解

十一日丙戌恒瑞永保奏言查滋擾房縣之賊前

經鄉民追剿除奔赴保康外大半俱屯於房縣

之南鬼谷子溝黑虎溝三里坪等處設卡盤踞

保康在房縣之東南其意俟官兵過後仍復窺

伺房縣該處翻過南山卽係四川地界更恐其

由此遁逃臣恒瑞永保並署總兵文圖帶領官

兵分爲三路派撥本處鄉民引路於二十四日

自房縣裹糧前進次日行抵賊卡賊匪未及防
備隨督令官兵直前攻撲將鬼谷子溝賊匪痛
加殲戮趕抵黑虎溝搶占山梁賊匪俱奔三里
坪守禦該處爲賊匪從前起事之所四面皆有
卡寨臣等率領官兵拏卡圍繞把守嚴密賊人
斷不能復出聞其口糧無多賊勢亦不能久耐
設法攻取不難迅速肅事又探得前赴保康之

路有岷峪五虎埡二處係大路緊要咽喉亦有
賊匪屯聚阻遏官兵且該二處與三里坪捷徑
相通現派文圖帶兵前往三里坪堵禦

臣

恒瑞

永保進取岷峪五虎埡行抵該處見山梁俱有
賊人占踞官兵出其不意迅速搶上賊衆甚露

張惶隨紛紛竄至岷峪溝迤下七里灣地方現

在大路已通查七里灣路通穀城

臣

等飛札穀

城守口官兵令卽相機進取

臣

等順溝下壓以

便堵截剿殺適總兵彭之年得信卽領兵由七

里灣迎剿前來賊匪無路可遁隨翻過山脚由

二榔溝渡河入於保康東北之白雲寺大山屯

聚

臣

等一面知會彭之年就近進剿

臣

等由保

康之黃連溝山進攻四月初一日進抵白雲寺

山察看山峻林密雖不能環繞堦圍而要隘處

所俱被我兵占據查問賊匪情形有由房縣逃
來者有在保康被鄉民殺散者俱與岷嶺五虎
垓二處逃竄之賊會合一處守險盤踞雖覺人
數衆多然大勢俱已窮蹙臣等現在設法攻剿
自可卽就撲滅

同日王德奏言連日接准河南撫臣景安來咨
呂堰驛一帶匪徒蔓延滋擾侵入豫境鄧州界

內臣悉心籌酌若俟該省需兵緊急

奏請添調鄧州距山東交界千有餘里誠恐緩不濟
急莫若先事預籌方爲得濟現在撫標克鎮各營兵
丁除此次已調撥赴楚兵一千名並分防城垣
及水陸各汛地外於存營兵內抽調五百名派
調膠州營副將銳勇巴圖魯穆維帶領督同遊
擊都司等官分爲兩起迅速起程交與景安富

成調撥均奏入

上命軍機大臣傳諭恒瑞永保景安曰房縣保康之賊屢經剿敗且官兵旣占住各要隘處所更無難悉數殲擒此時恒瑞等當倍加奮勉迅奏成功前已有旨令恒瑞永保二人內酌留一人在房保督剿一人速赴襄陽南陽一帶與景安等會同剿辦茲長陽一帶又有賊匪滋擾而房保亦尙須剿捕

恒瑞永保如實難分身前往應卽令文圖由興山一路速赴該處以資協剿再此時鄧州新野一帶匪徒是否業經剿散抑或仍往南竄驛路曾否通行無阻總兵富成所帶兗州兵一千名計算日內自已到齊現在王德又續派兵五百名前往更足分投堵剿著景安上緊辦理並迅速奏聞

同日恒瑞永保又奏言

臣

等自竹山剿賊前進

後各處居民驚疑甫定亦應酌留官弁帶兵彈壓適宜綿委副將百祥領兵五百名前來鄖陽臣等飛札百祥卽令在房縣適中之地駐劄以便於竹谿竹山房縣等處就近彈壓巡查奏入報

聞

十四日

巳丑

景安奏言連日附近鄧州三四十里

一帶村莊教匪乘勢蠢動經官兵率同鄉勇分
投剿捕殺戮多名並擒獲三百餘人楚匪見內
應匪徒已被兵勇剿殺不敢深入其襄陽以北
新野以南實爲逆匪之藪經臣於新店水等處
連紮三營以壯聲勢各路逆賊連日並未敢直
犯豫境惟襄陽迤北呂堰驛雙溝等處賊匪尙
衆俟兵力一齊卽當奮加剿洗

同日孫士毅奏言臣察看小坳地方形似仰孟

四圍皆有山梁中間瓦房樓屋共一二百間絕

非農家景象其中賊首陳啟明家最爲殷實由

山坳迤左三四里草蔡櫛比不下七八百間均

係賊匪佃戶蔡內堆積糧食甚多臣當將瓦房

及草蔡盡行燒燬因思該處路極險巖且賊衆

我寡山徑又處處可通無從設立隘卡若臣悉

力窮追前面並無官兵攔賊愈追愈遠後路堪虞遂於三月二十二三兩日內將我兵緩緩撤出現在楚省安福司及川楚交界苗容地方駐劄復派兵三百名令守備阿克東阿密赴小坳地面搜山見賊匪數十人在小坳窺探望見官兵立即奔逃該守備帶兵迅速趕上擒住三人並一白頭賊匪

臣

親加嚴詰據供係賊首楊禹

九又渾名丁麻子之父因被大兵攻破小坳燬
燬房屋該犯平日積有銀錢欲在瓦礫之內檢
取遂帶四十餘人前來不料官兵突至被擒等
語臣查楊禹九係來鳳作亂首犯係逆首之父
現在嚴禁候

旨此時在小坳六七里外之東溪溝山中屯聚賊匪
尙有萬餘人臣俟得有楚兵會合再行知會密

速夾攻以冀收復來鳳

同日宜綿奏言

臣

在商南途次接據商州知州

周光裕稟稱查得雒南縣地方客民楊廣武素

不安分近日家中來往形跡可疑之人甚多又

做白布衣服稟請究辦等語

臣

卽趕回商州該

州已先赴雒南

臣

復派乾州知州趙洵等分往

查拏署藩司姚學瑛得信亦馳赴該處隨將楊

廣武及夥黨盡數拏獲搜查各犯家中並無器械及不法字跡惟有白布衣服七件又在楊廣武家查出外來陳言仕一人一併解送前來

臣

卽飭該司率同各委員逐細推問緣本年二月二十五日陳言仕來雒南縣買鹽住宿楊廣武家中楊廣武邀鮑雲青等到家一同飲酒陳言仕卽告稱現在鄖陽府白蓮教起事與此處甚

近我們何不造些謠言說某月某日要反到這
裡百姓們自然驚慌可以就勢搶奪衆人俱各
聽允隨令鮑雲青等分投糾合匪徒各糾得四
五六人不等遂各做白布衣等件經署藩司督
同該州縣將案內人犯全行拏獲審訊屬實將
陳言仕楊廣武鮑雲周等分別正法枷杖現在
商州暨所屬地方日就寧謐

同日秦承恩奏言曰前大兵克復竹山據文圖
查獲僞示一紙示首開列海令字樣必係最要
逆首名號隨卽密札署竹山縣知縣范繼昌就
近訪查今據查明係緬逆首曹海揚曾於攻城
時被縣役陳印放鎗打傷左膀避匿廟內調養
大兵攻剿時乘間逃竄經該署令及署守備陳
兆熊分撥外委兵役前往追捕有竹谿縣監生

李勝帶領鄉勇將曹海揚搜獲適武生郭天珦亦至彼處訪拏向其奪取衆鄉勇不平郭天珦卽將曹海揚斬首先行解縣除將曹海揚剖屍示衆外武生郭天珦等功攘奪擅將逆犯斬首本應治罪但究屬急公應免直議竹谿縣監生李勝能於隔縣帶領鄉勇追獲賊首尙屬奮勉查總兵文圖前於竹谿縣蜡玉河殺賊時亦係

監生李勝引路自卽係伊一人飭查明酌賞頂戴以示鼓勵

同日柯藩奏言臣前往東西界梁查察卡隘二

十三日據遊擊鍾岳稟報帶兵前往洵陽堵禦十九日行至仙河口該處鄉民報稱鄖西交界之洞溝有賊匪屯聚卽帶兵前往殺死賊匪男婦六百餘人又拏獲男婦二十七名遺黨逃至

鄖西之北山寨等處現飭鄉勇追捕至竹山一帶逃往白河躲避難民知該縣已經克復陸續回家查有生監黃億賡黃經常張起珍等讀書院房二處囑令撥給暫住該生監等捐出米糧日給飯食湯水不致失所臣見其仗義至誠量爲賞資以示鼓勵均奏入

上命軍機大臣傳諭孫士毅宜綿景安秦承恩曰鄖

州一帶村莊教匪經官兵鄉勇分投剿捕楚匪見
內應之賊已被剿殺不敢深入看來豫省鄧州新
野一帶地方已漸寧靜所有守城剿賊出力之文
武各員均著景安查明咨部議敘至小坳地方係
賊匪舊巢所有房屋雖已盡行燒燬但賊匪屯集
處所不過草萊難保其不復行搭蓋孫士毅仍當
派委弁兵不時巡查賊首楊禹九之父楊應元既

經拏獲當卽行正法無庸羈禁至小坳一帶屯聚
賊匪據孫士毅奏尙有萬餘人爲數甚多孫士毅
務須督率將弁知會楚省相機夾擊將來鳳速行
收復再賊首曹海揚膽敢編造僞示希圖收拾人
心實爲可恨經官兵鄉勇擒獲時武生郭天璠爭
功奪取卽將曹海揚殺斃自有應得之罪俟事定
後再行核辦其幫同搜拏之監生李勝著賞給七

品頂戴鄉勇等並著酌加獎賞界梁地方生監黃
億寧等將讀書院房撥給難民並捐給糧米湯水
甚屬可嘉並著秦承恩酌賞頂戴陳言仕等倡謀
惑衆自當正法其鮑雲周等二十六人聽從搶奪
雖謀而未行亦不宜留於該處著卽由陝速行發
往回疆爲奴

同日秦承恩又奏言

臣

差弁探稟永保恒瑞統

領大兵由房縣前赴保康連日親督鎮將攻破
各處賊卡殺斃賊匪甚多已將保康縣城收復
現在搜洗餘孽招復居民卽前赴南漳進剿襄
鄖二府道路已通從此直抵荆宜與各路官兵
會合么磨小醜諒卽蕩平至保康以東去陝境
日遠現據鄖陽府知府王正常報稱湖廣督臣
卨沅已將軍需糧餉等項撥運到郡此後糧務

自應卽由楚省就近接辦以期便捷而省糜費
奏入報

聞

十五日庚寅畢沅奏言連日以來拏獲緹城賊匪

及乘夜自行縋出之良民訊據供稱賊人分爲
五寨楊起元是大頭目先鋒副將蕭登富中寨
頭目羅傳禮先鋒副將易廷柱左寨頭目王正

統先鋒副將熊道成右寨頭目陳德本先鋒副將陳德名前寨頭目劉季時先鋒副將楊起瑞後寨頭目李萬選先鋒副將全加寬除官兵擊斃外現賊尙有二三千名南北西三門俱築礮臺並挖濠溝抵禦惟東門用石砌塞目下油鹽柴薪垂盡俱已拆屋燃炊只望外賊前來援應誰知都被兵勇殺絕等語看來賊衆甚屬張惶

卽日有內潰之勢並據署江陵縣知縣魏耀查
出賊目熊道成楊起瑞祖墳發掘揚灰臣與舒
亮等惟有不遺餘力設法攻撲收復當陽以紓

聖廑

同日山西巡撫蔣兆奎奏言臣查楚匪滋擾蔓

延各處前經密札太原鎮總兵德齡於附近豫
省各營分挑選強壯兵丁二千名並派領將備

等暨官兵軍裝等項預爲籌辦以備調遣并密飭沿途各州縣預備應付調遣查豫省交界中隔太行山山南係豫省懷慶河內縣地山北係晉省澤州府鳳臺縣地今晉省官兵應卽前赴澤州府城暫駐聽候均奏入

上命軍機大臣傳諭畢沅景安蔣兆奎曰當陽賊匪業已攻圍多日何以尙能苟延殘喘現在續調之

兵自己早到賊衆旣形窮蹙畢沅惟當督令將弁設法攻擊殲擒首逆毋得再有延緩使賊得乘隙突圍他竄蔣兆奎奏挑兵二千名令總兵德齡帶領暫駐澤州聽候河南調用豫省河北地方近聞亦不甚安靜此項挑備之兵莫若就近移駐衛輝地方旣可藉資彈壓設景安等有需調用呼應尤爲便捷著傳諭蔣兆奎卽行知德齡遵照移駐衛

輝並著景安酌量情形設南陽鄧州一帶需兵堵
剿而進剿襄陽尙須添調兵力或卽將何北駐候
之晉兵酌爲調撥自更可期得力

欽定剿平三省邪匪方略正編卷八

丙辰年

四月十六日辛卯景安奏言查鄧州各村教匪乘

楚匪侵境羣起響應疊經兵勇奮力剿殺勢漸

斂戢楚匪因內應既絕亦漸南退尚在鄧襄交

界一帶滋擾時聚時散出沒無常茲於十一日

兗州鎮臣富成帶領頭起官兵行抵南陽臣與

面商俟後起兗兵到齊富成卽統率前進直趨

鄧襄交界賊匪出沒之處痛加剿洗

臣

俟河北

鎮兵到齊亦卽親統由新野向西堵截撲剿俟
廓清邊境再議分路南剿奏入

上命軍機大臣傳諭恒瑞永保景安曰鄧州一帶兵
勇已得勝勢賊已挫敗河北兵陸續到齊景安卽
可與富成等將鄧州一帶賊匪先行剿除肅清驛
路前赴襄陽相機夾擊恒瑞永保將保康一路賊

匪剿盡後應自西而東與景安等會合夾攻迅速
搜捕大約襄陽賊匪卽係恒瑞等於竹山房縣等
處餘賊未能剿盡毆之東來勾結本處匪徒滋擾
今恒瑞等前赴襄陽剿賊務須察看情形先將賊
匪東去之路派兵堵截與景安鄂輝等四面兜擒
悉數殲戮不可祇將賊匪剿散復令乘間竄入光
黃一帶又致蔓延方爲妥善

十七日

壬辰

惠齡奏言查灌灣腦四面皆係大山

道路叢雜山坳林箐間均有賊匪埋伏連日大

雨如注難以進攻初六日晚雨勢稍止

臣

卽將

兵分爲五路總兵富志那等帶兵三百名攻奪

北路各卡頭等侍衛關騰等帶兵三百名攻奪

東路各卡副將張持等帶兵三百名攻奪西路

各卡副前鋒叅領塔思哈等帶兵三百名攻奪

南路各卡臣率領道員先福等居中策應丑刻

督率各路同時並發將領等鼓勵兵勇轉戰而

前富志那一路奪卡至內坡關騰一路奪卡至

毛坪張持一路奪卡至偏崖均離賊巢不遠因

天復下雨卽於該處紮住至塔思哈一路奪獲

猴子包一卡後卽進奪石板坳一卡該處賊匪

甚多山坳又有伏匪突出將官兵圍住臣卽令

先福等帶領兵勇三百餘名由西路往援

臣帶

領員弁兵勇等由東路夾擊痛加剿洗殺死二百餘人塔思哈等見有兵援衝突而出內外合剿賊匪四散奔潰官兵從後尾追又殺死三百餘人將賊卡奪獲分兵紮住此次各路進剿頭等侍衛關騰副將張持叅將鄭鵬翼前鋒校倭什琿守備林朝輔鄧興相道員先福知縣楊界

署知縣蔣振萬均各身先士卒所向無前職員
周昌秀所領鄉勇陟險經危殺賊多名尤爲出
色計兩晝夜共擒佔賊卡九處殲斃無數把總
胡報國行營把總范升馬大貴外委趙朝珍滿
兵雙成生擒賊匪羅榮易德升李元李名黃宗
富等五名現在大雨未止令各官兵暫爲停歇
當提羅榮等審訊據供張正謨等見官兵雲集

不日進剿因於各處添設大小卡座並於山畔
暗埋地雷又挖坑伏有毒弩上用蘆蓆鋪土遮
蓋因連日大雨將地雷浸濕點放不著伏弩亦
皆塌陷致被官兵殺入隨將羅榮等五犯卽於
軍前正法並將出力官兵優加賞賚鄉勇等遵
旨賞給鹽菜口糧現在署荊州將軍成德已到軍營
惟有公同商酌設法進攻以期速滅首逆

同日景安奏言本月初三日鄧州牧周璣據南鄉夏莊東鄉土山店各報闖毆斃命之案該州聞報往驗行至半途有監生丁潤王振坤任殿邦張洪洛等攔路稟稱聞有雙橋舖教徒任萬士已聚多人欲往應楚逆假捏命案包藏禍心請勿前往該州當卽回城會營帶兵令該監生等多帶鄉勇一同前往查看情形任萬士等遂

蠡動抗拒當經兵勇等同心戮力立將賊人圍
繞殺獲三百餘名並將爲首之任萬士朱學從
等生擒經該州審訊明確緣該犯等向與楚省
教首袁錦元往來糾約今假捏命案欲圖戕官
陷城爲賊內應當將該犯等立即正法並將奪
獲白布刀鎗等件賞給各鄉勇等情臣查勘無
異因思此次設非于潤等通信攔阻該州城池

幾爲所襲該監生等又能率領各村鄉勇剿殺
多逆實堪嘉尚理合據實奏

聞均奏入

上命軍機大臣傳諭畢沅惠齡景安曰鄧州夏莊賊
黨假報命案誑誘知州往驗經丁潤王振坤任殿
邦張洪洛等通信攔阻立將首犯拏獲該州城池
不致爲賊所襲丁潤等四人甚屬可嘉著先賞給

六品頂戴交與景安察其才具以千總把總酌量
拔補至惠齡一路官兵進剿適值連日大雨將賊
匪所埋地雷弩箭浸濕塌陷賊匪不能點放官兵
得以進取殲賊多名奪獲卡隘此皆仰荷

天神佑助欽感之餘倍深欣慰惠齡因山路險阻親率
弁兵冒雨進剿尚屬奮勉著賞大小荷包其各路
帶兵出力員弁著惠齡查明實在奮勇者開單具

奏候朕酌賞其擒獲活賊之把總胡報國范升馬
大貴著卽以千總拔用外委趙朝珍卽以把總拔
用滿兵雙成遇有本處應陞缺出卽行陞用其餘
打仗兵丁賞給一月錢糧以示鼓勵鄉勇人等業
經該撫賞給鹽菜口糧如有超衆出力者卽酌賞
頂戴口糧示獎

十八日 癸巳 鄂輝奏言 臣與烏什哈達剿散呂堰

驛賊匪於四月初四日回至襄陽相機堵剿茲
於初七八兩日探知賊匪竟敢至樊城放火並
欲渡河經城上大礮轟擊始行退去初九日忽
有賊匪從襄陽南漳穀城交界之茨河一帶直
欲撲城臣與總兵徐昭德等分在南門東門長
門三處各督弁兵施放鎗礮殲賊甚多賊隨退
至郡城一里外屯聚此次三門殲賊千餘人搜

擒賊匪二十餘人訊係襄南穀城逆匪沿途勾
結前來當經正法梟示並獲綢布等旗及刀子
數百件是時樊城沿河賊匪亦欲乘勢渡河經
遊擊朱廷荃都司王化龍督兵開礮擊翻小船
木排四五隻賊遂不敢再渡旋經護通判陳德
基等率領鄉勇從後追殺賊始退散本日復因
宜城告警該縣係驛站大道恐有疎虞隨卽商

令烏什哈達帶兵三百名前往防護再現在兵力較少不敷戰守之用至鄉勇等係由各處派來實不可信邪教卽隱匿其中偶有疎虞不能保其無變綠營兵祇能列戰放鎗每與賊戰竟不能衝突向前臣思似此平坦曠野賊皆步行設有數百騎滿洲索倫等兵加以曾經出征大員帶領綠營兵丁不過一二仗挫其膽氣辦理

較易臣目覩情形不能不據實陳奏奏入

上命軍機大臣傳諭鄂輝曰鄂輝帶兵無多於賊匪
至樊城襄陽滋擾時能移率弁兵奮勇擊追賊匪
甚屬可嘉著賞給副都統銜並加賞玉搬指大小
荷包以示獎勵其分門帶兵之侍衛烏什哈達總
兵徐昭德等及擊殺渡河賊匪之遊擊朱廷荃等
均著查明咨部議敘至所奏賊匪俱係步行若得

精銳索倫達呼爾兵數百名乘騎直前衝殺無難
剋日殲擒所奏雖是但京營馬匹送往襄陽不特
有需時日且行走亦恐疲乏未能得用前據景安
奏已預備馬五百匹襄陽各標營本有馬匹而恒
瑞所帶西安駐防又皆係馬兵儘可於此內挑選
乘騎嫻熟者以爲當先剿賊之用且從前臺灣用
兵時福康安曾將蒙古偷馬遣犯奏明帶往頗得

其用彼時鄂輝同往臺灣豈不知之向例蒙古偷馬人犯三四匹者俱發遣湖廣河南各省地方此等人犯於乘騎最爲趨捷如果需用鄂輝卽知會畢沅景安等選擇精壯者挑赴軍營應用若剿賊得力事竣後卽可釋其前罪遣令各回遊牧該犯等知可立功贖罪必踴躍報効京營兵丁乘騎尙未能如伊等之趨捷而索倫達呼爾兵遠在黑龍

江等候調往亦恐緩不濟急至巴圖魯侍衛已兩次發往二三十員皆係便於弓馬善能領兵之人必可得力也

二十日^{乙未}景安奏言據鄧州稟報襄陽逆匪仍

復聚集該州交界魏家集一帶^臣探查雙溝地

方爲賊匪屯聚之區四分滋擾出沒無常官兵東指敵卽西擾其意不過倚恃賊衆多使官

兵疲於策應窺探虛實計圖乘勢侵襲

臣

現與

富成分路進剿計慶成所帶之兵日內亦可趕到並知會恒瑞永保等四面夾攻不難一鼓蕩平再襄陽爲全楚門戶豫省唇齒相依關係萬緊必須厚集兵力前獎

賞撥山西兵二千名

臣

已飛咨山西撫臣蔣兆奎並

札鎮臣德齡迅速帶兵前來協剿奏入

上命軍機大臣傳諭恒瑞永保梁肯堂畢沅惠齡景
安曰恒瑞永保在保康白雲寺山內搜捕賊匪爲
日已久節經降旨令帶兵速赴襄陽何以尙未奏
報起程實屬延緩著傳旨申飭再楚北賊匪不過
藉邪教爲名煽誘糾結其中教匪從賊者固多而
被賊迫脅煽誘者亦復不少若不設法解散則賊
黨日聚日多豈能盡加殲戮著傳諭領兵將軍及

該督撫等速行出示遍加曉諭以現在大兵四路
雲集賊匪不日殲除內有無知鄉愚一時被賊誘
惑及迫脅入黨者若能及早省悔自行投出卽係
平日誤習邪教之人一經投首皆可免其治罪倘
有能將賊首賊目斬獲擒獻者不但不治以從賊
之罪並當優加獎賞如此明白示諭加以賞勸不
特賊黨易於解散並可使幫同官兵出力亦剿撫

並施之一策又湖北現在各路大兵雲集豫省亦有官兵過境需費較多著於內帑撥銀二百萬兩解貯河南南陽府以備應用著梁肯堂卽派委幹員沿途分起妥爲運送並著景安於豫省交界地方分派妥員接替起運存貯南陽府庫以濟急需并預備楚省供支之用

臣等謹案聖王在上以仁育萬物以義正萬

民二者固相輔而行楚北教匪滋事連及數
郡縣嘯聚日多其實不過一二莠民倡爲邪
說而鄉閭椎魯之氓漸爲其所誘惑附和爲
奸甚至焚掠村墟所在小民因迫於賊鋒被
脅入黨勢不能免我

皇上軫念生靈惟恐大兵迅掃或致玉石俱焚
特令帶兵大員及督撫等一體妥辦並剴切曉示諭

令自行投出免其治罪有能斬獲賊匪擒獻
尙當加以獎賞仰見

聖人好生爲心於鋤暴之中寓寬大之意使彼梟獍
負隅早知悔悟自新亦何至不容

覆載乃該逆等孽不可追自取誅夷豈非天奪其魄

二十二日
酉丁

奏言據百祥稟稱該副將初

抵鄖陽經知府王正常商同帶兵護送房縣糧餉及房縣之圍既解又經將軍派令留於該處

協剿

臣

查泥河口內賊人據險固守叅將九十

僅帶兵五百名不敷攻剿之用

臣

前擬赴鄖陽

剿賊會豫調寧夏鎮兵一千名當經飛檄催儻

前來

臣

卽於初九日帶領前赴泥河口其商州

一帶就

臣

前次所調延榆等處赴商兵丁內各

兵二百名在雒南縣城及商南之武關隘口
防守又於商南留兵五百名並將署藩司姚學
瑛運送大小礮位分佈各該處再查有延綏鎮
總兵楊秀爲人誠實老練且久歷戎行堪以委
任前經帶兵來商卽令其暫駐商州彈壓奏入
上命軍機大臣傳諭宜綿曰宜綿身任陝甘總督祇
可在鄖縣鄖西漢江迤北一帶堵剿未便前赴漢

江以南以致伊本管地方難以兼顧如耶縣耶西
附近之賊業已剿盡或酌派鎮將一員令其帶兵
前赴襄陽助剿自更得力並著宜綿酌量情形如
該處尙須防堵難以分兵亦不必拘泥遵旨也

二十三日

戊戌

宜綿奏言查泥河口距鄖縣二百

餘里地有大山賊匪據爲巢穴名曰孤山大寨
又有雞冠寨廣山寨以爲應援查該處賊首係

鄭縣民人王全禮與其兄弟王全仁王全義王全智王全信等俱拜同縣人徐良爲師學習邪教本年正月十二日徐良來至泥河口令其於三月內起事王全禮卽私製軍械等項聽候消息二月二十五日竹山縣匪目吳明山遣盛得順來告竹山已破囑令卽行起事約定三月十八日先搶白河洵陽再搶鄭西等處並給與綠

布小旗一面爲號王全禮與伊弟及姪王之俊
約同匪黨周克貴王朝棟張廷忠等糾合二千
餘人在廣山孤山等寨分駐以便屆期西犯該
處居民招集義勇連次與賊打仗互有勝負經
提臣柯藩派委遊擊王清弼撫臣秦承恩派署
遊擊張彪各帶兵來剿護興漢道文需於白河
縣招募鄉勇委員率領隨同剿賊並臣派委之

叅將九十遊擊常格同抵該處先將泥河口賊人殺散仍卽分兵入山九十常格帶兵攻雞冠寨王清弼張彪帶兵攻廣山寨連攻數日因天雨泥濘且係仰攻未能卽得嗣經撫臣秦承恩送到將軍礮二位運赴山上連次轟擊將賊寨打破並擊斃賊匪三十餘名賊不能支持全行撲出王清弼等督率官兵鄉勇奮力截殺殺死

賊匪三百餘名生擒一百餘人隨又進攻孤山
大寨其雞冠寨賊匪約有三百餘人九十於夜
半乘其不備將木寨燒燬賊匪半被焚斃復繞
至孤山前面與王清弼等會兵一同攻打維時
鄖陽協都司郭廷樞亦帶兵前來助戰因賊寨
下俱係陡壁不能攀援而上臣明亮於十二
日趕到卽與柯藩籌議山寨雖小而堅必須誘

令出戰方可一鼓殲擒隨於十三日寅刻先遣王清弼帶兵前往斷其汲道賊人隨拚命來爭一面飭令挑備勇健兵丁蛇行而進悄赴牆根將火彈拋入寨內頃刻火起又將賊匪所藏火藥引著烟焰漲天官兵乘其慌亂爬上石牆殺死賊匪一百餘名燒斃及跳崖死者不計其數寨外之賊見寨內火起一時驚潰除被官兵砍

殺外生擒四十七名內王全禮及王全義王之
俊周克貴張廷忠俱係寨內賊首隨向各賊訊
問王朝棟徐良下落據供王朝棟實已燒斃徐
良於未起事前經鄖縣拏獲殺死衆供相同隨
將王全禮凌遲處死其王全義等四十六犯卽
行處斬梟示並搜獲賊礮三個烏鎗長矛刀劍
甚多及燒過糧食大小二十七器次日仍令弁

兵分路搜山傳詢土人俱稱泥河口爲鄖西賊藪經此番搜剿實無餘孽民情安堵如故

同日成德惠齡富志那奏言臣成德行至軍營

會同察看灌灣腦山勢係於衆山之中獨出一峯自下而上約十餘里怪石巉巖塞滿道路一線羊腸極爲險仄遙望半山勢漸陂陁一至腦上卽覺平曠寬可七八里周圍約二十餘里多

係陡坎沿山上下凡屬可通巢穴之處皆紮立
賊卡惟左首有蔡家坡一卡恰當進兵之路石
峯林立勢居扼要必須將此卡奪佔官兵進剿
庶免後顧之虞因於十三日寅刻督同侍衛將
備等帶領兵勇潛至坡下乘霧湧上守備林朝
輔千總張瑗首先躍入卡內兵勇隨亦搶進殺
斃一百餘人匪徒倉惶奪路臣等從後追捕又

殺死數十餘人餘賊奔回巢穴旋見賊匪二千

餘人蜂擁而來臣富志那同關騰帶兵伏於左

右林內臣成德惠齡帶兵在坡上排列鎗礮連

環擊打賊匪爭先直撲富志那關騰從兩旁殺

出賊腹背受敵驚惶奔竄落巖墮澗死者不計

其數臣等從上壓下又殺死數十人因天已傍

晚將官兵撤至坡止連夜趕紮木柵詎賊匪復

於十四日巳刻搖旗吶喊我兵相擇地勢用礮
從石罅轟擊打死二十餘人見有一賊手執白
旗向礮指畫拜舞似施邪術經廣東叅將鄭鵬
翼對准施放正中執旗賊人登時立斃衆賊相
顧驚愕四散逃去臣等登高瞭望山脚下沿溪
麥田大半黃熟恐致反資盜糧卽於夜間派令
叅將許文謨候補都司劉管城各帶兵勇埋伏

一面令守備鄧興相林朝輔等潛至山根放火
將麥焚燒賊衆趨下救護官兵放鎗擊殺時風
勢甚烈黃熟之麥盡行燒燬賊匪捨命迎敵許
文謨劉管城沿溪兩路殺來賊始驚慌奔竄兵
丁陳初成鄉勇楊坤等渡水追殺生擒趙愷鄧
得珍二名餘賊逃回山內二犯訊明正法現於
左右山梁及灌灣腦後路躡探路徑乘隙直上

四面圍擒以期掃蕩再

臣

惠齡接據巴東縣馮

振鸞稟稱拏獲奸細溫名言訊據供稱林之華

等現在榔坪聚眾五六千人有欲從巴東水路

前赴宜都與張正謨會合之語並供栗子水村

亦有匪徒數十人暗與林之華勾結希圖援應

該縣隨將溫名言正法一面帶領鄉勇人等連

夜馳至該處搜拏匪徒率眾拒捕當被鄉勇等

殺死三十四人生擒田敏等二十一人訊從逆
約會屬實俱各正法其東湖興山等縣經臬司
張長庚委縣丞宣葆光盤獲吳谷年一犯訊出
賊目陳達治自保康潰逃至七里冲地方復同
匪目劉大光等糾集多人欲赴保康援救宣葆
光卽馳赴該處搜捕陳達治等率衆抗拒該縣
督率鄉勇四面圍擒將劉大光及匪夥六十七

人登時殺死並生擒陳遠治餘匪逃散隨將二
犯審訊據供習教從逆於攻陷保康時陳遠治
殺死縣官之妻經賊目曾世興偽封將軍當將
二犯凌遲處死梟示現仍嚴密搜緝不致疎懈
同日恒瑞永保奏言查三里坪之賊經文圖於
初九日督率官兵履險直上賊衆捨命迎敵經
官兵鎗箭齊施各鄉勇兩路撲上賊人不能抵

禦紛紛敗竄官兵尾追剿殺餘賊滾山落澗盡
被圍守兵勇截殺統計該處賊匪幾及三千餘
人全被殲戮至保康白雲寺山圍住之賊連日
攻打剿殺甚多賊匪不能支持退入山後之黑
龍溝內臣已督兵佔據白雲寺山其黑龍溝之
東北面山名長嶺係穀城總兵彭之年帶兵及
穀城鄉勇把守現在踞探道路相機下壓剿洗

臣文圖俟此間剿竣再遵

旨遄赴來鳳協剿

同日恒瑞永保又奏言房縣三里坪擒獲之邢中耀保康縣擒獲之曾世興訊係該二處領衆爲逆頭目臣等細訊根由據供此等邪匪有願學習入教者何人口授靈文卽爲師徒輾轉傳授或以稍裕之家或以強有力之人推爲頭目

稱爲掌櫃又供出姚文學並其父姚之富係從
前在此一帶初倡傳教者均稱爲老師傅今年
二月姚之富姚文學父子俱來保康口稱現應
起事姚文學卽往房山一帶傳信各集匪徒姚
之富回襄陽本籍是卽屬竹山房縣保康一帶
竟係姚文學父子爲首倡逆當卽根究姚文學
下落據供已在房縣蔣口地方被鎗擊斃確鑿

有據証之鄉民亦稱屬實再訊姚文學父子又
係傳自何人據稱他們與劉之協並前被甘省
拏獲業經正法之劉松俱稱老師傅但不知他
們是否亦係師徒姚之富家住襄陽彭家疇地
方劉之協常在河南泌陽縣姚三猴兒家居住
等語臣等當卽密行知會湖北督臣畢沅撫臣
惠齡河南撫臣景安嚴密緝拏曾世興和中耀

二犯解京以備研訊卽委員解赴興安交陝西撫臣秦承恩轉派妥員速行押解進京均奏入上命軍機大臣傳諭恒瑞永保惠齡景安曰恒瑞永保奏三里坪一帶賊匪俱係文圖剿淨而恒瑞永保僅將保康山雲寺山賊匪追至黑龍溝地方並未將賊匪速行掃蕩所辦何事著傳旨申飭仍著恒瑞永保將該處賊匪剿洗淨盡卽馳赴襄

陽會剿倘黑龍溝一帶賊匪負嵎固守亦當酌分
一人速赴襄陽協剿斷不可拘泥二人株守一處
也其在三里坪奮勇殺賊之員并鄉勇等如有超
衆出力者並著查明具奏候朕格外加恩至文圖
剿賊甚爲奮勉現在巴東一路營汎單虛恐賊匪
乘間滋擾著傳諭文圖卽刻帶兵由興山歸州一
路速赴巴東等處剿殺賊匪如該處賊已剿淨而

惠齡在深沖口尚未擒獲賊首卽著文圖幫同惠齡剿辦知縣馮振鸞著卽以同知補用縣丞宣葆光著卽以知縣補用其出力之叅遊都守等查明實在奮勉者遇缺陞用餘均著咨部議敘至恒瑞等所奏拏獲賊目供出姚文學姚之富父子爲邪教首犯與劉之協係屬一黨姚之富家住襄陽彭家疇地方劉之協常在河南泌陽縣姚三猴兒家

居住著傳諭恒瑞慶成等於到襄陽後卽飭地方
官按照姚之富住址嚴密查拏並著景安卽將供
出之姚三猴兒迅速拏獲究出劉之協下落該撫
務宜飭屬密爲妥辦不可稍涉張皇擾累

上諭內閣曰宜綿柯藩明亮將泥河口賊匪全行殲
斃並將緊要賊首悉數擒獲肅清地方實爲奮勇
迅速宜綿柯藩俱著交部議敘明亮著加恩賞給

頭等侍衛作爲領隊出力將弁並著宜綿查明咨部議敘此次打仗兵丁皆賞一月錢糧鄉勇亦皆酌賞以示獎勵

二十四日巳景安富成奏言查雙溝在新野之

東南呂堰驛在新野之正南若專剿一路賊必

乘虛北擾必須兩路進剿方免牽制臣等熟商

臣景安帶河北兵五百名在新野東之水臺一

帶堵禦雙溝賊匪

臣

富成帶領充鎮兵六百名

先將鄧州邊界魏家集賊匪掃除卽趨呂服驛

進剿茲於十七日酉刻

臣

富成馳抵魏家集該

處賊匪已被兵勇剿殺南竄當卽提齊充鎮兵

一千名沿路搜捕直趨呂堰十八日酉刻行至

新野之張家莊見有賊匪六七百人在彼焚搶

當卽督率將弁並

臣

景安派往之署南陽鎮遊

擊揆明鼓勇向前賊匪公然抗拒我兵鎗礮兼
施打死賊二百餘名餘皆紛紛逃竄我兵奮力
追趕分赴麥地搜捕復擊斃數十名時已昏暮
回至新店鋪駐紮臣等現擬一由水臺直搗雙
溝一由新店鋪進剿呂堰務將逆賊剪除廓清
驛路直趨襄樊痛加剿洗再兩次賊匪擾及魏
家集武舉李萬世等聚集鄉勇數千人前後殺

賊甚多實屬出力

同日孫士毅奏言據都司清福稟稱卯向賊匪
於三月二十六日從左首山後突至村莊焚搶
經副將樊繼祖就近悉力堵禦該都司聞信帶
兵前往賊匪當卽逃去二十八日賊匪聚集一
二千人直撲石梁子山梁經都司清福等帶兵
分布屹立以待該匪等四面撲上我兵鎗箭並

發從上壓下該匪等不能抵禦跌斃山坳不可
勝計我兵奮力追剿該匪等淩箐越嶺四散奔
逃割取首級一百五顆其倒地被賊搶回者甚
多四月初二日賊匪復厚集匪黨數千一半向
石梁子遠遠放鎗一半伏於左右山坳其意俟
石梁子官兵下來剿殺伊等卽分搶山梁奪我
營盤該都司等帶兵三百名飛速前迎賊匪等

作作畏懼徐徐退後守備阿克東阿靳文銓一
聞鎗響卽帶兵繞出賊匪後面忽見左邊山坳
伏有賊匪五六百人遂直前剿殺喊聲大振所
伏賊匪不料我兵猝至喪膽奔逃匪衆知後面
伏匪已敗前面官兵又至一齊慌亂經我兵痛
加殲戮此次陣亡外委一名兵勇各三名受傷
兵丁五名現已一一優賞所獲刀矛等物俱賞

給鄉勇人等再臣營現存兵祇三四百名查有

瓦寺等處土司呈請情願派撥土兵隨營効力

臣現在發檄詢問附近木坪等處果否情願出

兵不必稍涉勉強約可得數百名俟此項兵到

臣再酌量調撥再據護川東道趙秉淵等稟稱

湖北竹谿縣匪徒在大寧縣與陝湖交界一碗

泉地方滋事當經該道府等帶領兵勇趕至附

近一碗泉之錯溪口剿捕殺斃一百餘人活擒
鄧仲舉一犯訊據供稱在大寧縣居住本年二
月間有竹谿向家壩居住之趙元照同伊堂兄
鄧仲文將伊裹去入教趙元照是竹谿大頭目
還有吳盛乾王柯中蔡起倖王興留都是該處
頭目等語復據該道府會同署夔協遊擊愛隆
阿稟稱探知由烏龍溪至一碗泉沿途均有賊

匪當卽派撥署守備陳國英等分投攔截設伏
該道府遊擊等各帶兵勇分路剿殺賊匪奔逃
兵勇奮力趕剿追至竹谿縣之冒鼓坪經該處
鄉勇截住當將餘匪盡行殺斃令竹谿本地鄉
民將沿途殺死賊匪一一識認據稱賊首趙元
照王興留蔡起倅鄧仲卿四犯殺斃在內當將
四犯判屍並其餘各犯屍首俱一一梟示尚有

賊首吳盛乾鄧仲文二犯逸去未獲其賊首王
柯中一犯業經墊江縣知縣李毓璣緝獲到案
均奏入

上命軍機大臣傳諭孫士毅宜綿景安曰來鳳縣卯
崗賊匪經孫士毅董率弁兵痛加殲戮所辦殊屬
可嘉著賞給大小荷包其出力之都司清福等如
果始終奮勉著孫士毅以應陞之缺陞用其陣亡

外委著咨部加一等議卹又據奏川東道府等稟
報拏獲竹谿賊匪鄧仲舉供稱趙元照是竹谿大
頭目還有吳盛乾王柯中蔡起倖王興留都是該
處頭目等語竹谿賊匪早經恒瑞文圖等先後帶
兵剿散趙元照既係該處頭目現在何處藏匿並
著宜綿查明各該犯如未經官兵剿戮務須就近
飭該地方文武按名拏獲勿任漏網又景安等奏

遊擊揆明鼓勇向前鎗礮兼施打死賊匪二百餘
名殊爲出力著卽以該省應陞之缺陞用武舉李
萬世聚集鄉勇殺賊甚多著以千總拔補

二十六日辛丑畢沅奏言臣等攻剿當陽因日久

未下心急如焚再四熟商於東南北三面環攻
留西門一面縱賊逸竄方可痛加截殺並於長
坂坡安設營盤將壯銳兵勇盡匿營內又於數

里外坡坎低窪之處密設伏兵以羸弱鄉兵百
十名佯爲無備之狀十五日辰刻賊果潛開西
門擁出數百人直撲長坂坡西營惟時武黃同
知常丹葵率領兵勇首先截住直前迎殺遊擊
什圖叅將馬爲錦藍翎六達色等衝出接應舒
亮阿克棟阿等自北而西守備羅大炳護當陽
縣事程永冽等自南而西均往接應殺賊二三

十名鎗中執旗領隊之大頭目熊道成等三人
各路兵勇齊至復加圍截殺斃賊二百餘人生
擒賊目張仲選及夥匪等六人奪獲旗幟礮位
攔牌刀矛火彈等項甚多賊匪見前隊被殺一
面將城門緊閉卽在城上拋擲磚石我兵衝至
城根扒城欲上賊人憑高下擊臣以兵力無多
不得不少加愛惜至張仲選等訊據供稱今日

大頭目楊起元派一千多人分作三隊出城想
搶西門營盤奪路逃走今頭隊熊道成等俱被
鎗傷搶回城中賊人急欲逃往遠安宜昌等語
隨將各犯正法梟示臣又繕寫簡明告示令良
民及早逃出以散賊勢昨今兩日縋城而下者
絡繹不絕詢問情形痛哭呈訴當卽分別安撫
又據荊門州石橋巡檢沈曰淑帶領鄉勇頭人

曹思慤張青選等於三月二十七日在腰定觀
堵剿殲斃假充鄉勇接應當陽賊匪三百餘人
生擒余大雲等六人訊明正法並搜獲木印一
顆白布旗祔等件是此時外援斷絕內賊已萬
分窮蹙臣等惟有竭力急攻以期旦晚收復馳
報捷音

同日景安奏言據唐縣知縣劉元吉稟稱探得

襄陽縣雙溝村賊匪內有襄陽二畹山下居住
之周姓兄弟四犯又襄陽小李莊之謝秉昌一
犯皆爲賊首本月初九日各潛回家搬取家屬
等情當令武舉高萬嵩謝殿魁武生方進修武
童王正元鄧鵬飛帶領鄉勇夜半馳往黎明抵
村搜捕該犯等持械出拒當將周勲良登時扎
斃並將周勲義周勲富周五兒周勲義之子周

會友並謝秉昌等五犯生擒研訊據各犯供稱
向以竊奪爲生二月間糾約多人各處縱火搶
劫後又隨同教匪合夥抗拒官兵等情卽將該
犯等正法懸首該縣各卡口示衆查唐縣知縣
劉元吉平日居官勤能強幹茲復設法探訪鼓
勵該武舉等越境俘獲賊目多名實屬奮勉能
事武舉高萬嵩等保守地方擒獲要犯亦屬勇

往可嘉均奏入

上命軍機大臣傳諭吳沅景安曰當陽城內縋出良民亟宜妥爲安撫卽將來大兵入城查明並未從賊祇係被脅者亦應一體綏輯勿使失所此次隨同打仗之同知常丹葵遊擊什圖叅將馬爲錦藍翎六達色著以應陞之缺陞用景安奏唐縣知縣劉元吉激勵奮勇獲賊多名實屬奮勉能事劉元

吉著賞給同知頂戴並著景安查明該員如果始終奮勉卽以同知陞補其拏獲要犯之武舉高萬嵩謝殿魁著以千總拔補武生方進修武童生王正元鄧鵬飛以把總外委分別拔補

二十八日

癸卯

宜綿奏言襄陽樊城爲南北咽喉

要地斷不可使賊人滋擾

臣

與明亮計議將攻

剿泥河口賊匪之固原兵五百名仍交叅將九

十遊擊常格帶領隨同明亮前往相機堵剿卽
於二十日令其由鄭陽前進所有在泥河口等
處打仗出力員弁兵勇謹開單恭呈

御覽

同日恒瑞永保奏言臣等於十四日由白雲寺

山分兵四路下壓剿殺賊匪無數將賊巢縱火
焚燒至十五日賊勢窮迫踉蹌捨命而奔爭赴

東山長嶺嶺之東北面有總兵彭之年帶兵堵

禦東南面係南漳縣鄉民把守

臣

等當卽知會

約定於十六日五鼓時齊力攻剿

臣

恒瑞永保

文圖各帶官兵並本處鄉勇亦各分路一齊攻

上初則賊匪滾石擲擊我兵不避危險爭先攻

撲乘賊衆慌張錯亂痛加殲戮並有落崖滾澗

身死者奪獲白旗鳥鎗鐵破刀矛等件尚有乘

間亂竄者約有一千餘人俱捨命攀援奔上高山極頂聚集藏匿亦不過暫作苟延之計現在

設法攻剿數日定可殲除嚴事至文圖前經奉

旨令其前赴來鳳惟彼時臣等正在分兵圍攻之際

斷不能分撤官兵另往他路現在餘孽未清文

圖尚未起程臣等愚昧之見楚豫交界爲南北

通衢大路聞賊匪甚多更當早爲撲滅臣永保

遵

旨先赴襄陽相度情形隨機辦理

臣

恒瑞帶領署總

兵文圖將保康未盡餘賊剿洗淨盡後亦就近

先赴襄陽查看賊匪多寡情形如果無須

臣等

所領之兵

臣

恒瑞卽同署總兵文圖各領原帶

之兵趕赴長陽一帶協剿再查保康縣本無城

池賊匪驟起該縣陳世章猝不及防被賊網縛

該縣在賊營存活二十餘日被辱貪生之咎實
所難辭至該縣平日居官大約柔軟無能所以
賊人亦不深恨且該縣經鄉民救出送往南漳
追縣治經鄉民奪復臣等抵縣該縣尚在南漳
似是懼賊怯懦若將該縣仍行留任無以示懲
又查賊蹂躪縣治時賊多兵少不能抵禦外委
尤景周兵丁四名俱奔至歇馬河糾集鄉勇同

來奪復其功過似可相抵均奏入

上命軍機大臣傳諭孫士毅恒瑞宜綿惠齡曰宜綿
令明亮帶兵前往襄樊堵剿籌辦甚合機宜著賞
給玉搬指大小荷包以示獎勵其出力之文武員
弁均著咨部議敘此時襄陽一路景安富成已由
鄧州新野帶兵進剿現在永保明亮亦已前往又
有鄂輝烏什哈達徐昭德等在彼協力剿辦該處

兵多將廣自可將附近賊匪迅就殄除恒瑞文圖
竟不必前赴襄陽速將黑龍溝一帶賊匪剿捕淨
盡卽應前赴長陽來鳳等處相機剿辦至保康縣
知縣陳世章居官柔軟無能著革職發往新疆効
力贖罪